



UNIVERSITÄTS-  
BIBLIOTHEK  
PADERBORN

## **Universitätsbibliothek Paderborn**

### **Historia Missionis Anglicanæ Societatis Iesv**

**More, Henry**

**Avdomari, 1660**

Argumentis alijs detegitur fabula. n. 46.

**urn:nbn:de:hbz:466:1-38320**

XXXXVI. Mendacem verò fictamque fuisse hanc omnem tragæ-  
diam ( præter veram Squiri necem ) & vel ab ipso Squiro confarcinam  
vt se Magistratui in insulæ ingressu commendaret, vel ab subornatis testi-  
bus Stanleyo, Mundæo, Rollo illi impositam, multa sunt quæ suadent  
præter ea quæ *Richardus* obseruauit. Narrant enim qui fauent conspira-  
tioni non fugisse Squirum ex Hispanijs, sed permutatione facta cum cap-  
tiuis Hispaniensibus excessisse, cum palam sit ex ipsiusmet literis subdux-  
isse se clanculum. Tum *Walpolus* aiunt cum videret Squirum nihil in  
isto genere attentare, permisisse cuiusdam ex Hispaniensi captiuitate re-  
deunti in Angliam, rem vt optimatibus detegeret, & Squirum accusaret.  
Quasi verò *Walpolus* tam prodigus esse potuerit famæ suæ, vt cum tantum  
scelus latere potuisset, nullo fructu suo nisi ingentis probri, propalandum  
permitteret cuiuslibet transfretanti. Hic verò, cui res permissa dicitur, redux  
in Angliam, non se missum, aut permissum aiebat eo fine, sed clam literas,  
quas ferebat, subfuratum esse ex conclaui. Tam *difficile est sibi inuicem co-  
herentia proferre inter mentiendum.* Illud non potui sine admiratione, di-  
cam? an indignatione aliqua legere in actis à quodam qui intererat recita-  
tis, Squirum cum in iudicio de capite se defenderet, palam repetiisse se quinque  
horarum dirissima quæstione laceratum falsum esse quæ neque dicta, neque facta  
vnquam à se fuissent, tantum vt à tormentorum acerbitate liberaretur, Procura-  
tores verò Regios, eodem loci affirmasse adhibitum eum nunquam fuisse  
quæstioni; quæ lectori concilianda relinquo: Mihi enim hinc confici  
certissimè videtur, rem totam non sine apertissima partium collusio-  
ne transactam: Cum interim Rollus, quicum ex Hispanijs traiecerat Squi-  
rus, in Arce teneretur clausus, nè Squiro neganti se quidquam cum illo  
de huiuscemodi rebus habuisse sermonis si contentiret iudicium de capite  
interturbaretur; liberiorque Stanleyo, & Mundæo, notis quadruplatori-  
bus daretur potestas quæ vellent crimina Squiro imponendi: Quæ ars  
non est apud illos infrequens qui vt fines suos consequantur, nullum ar-  
bitrantur scelus esse indecorum. Hæc acta sunt dum Hispali degeret *Wal-  
polus*: Qui amotus inde Vallisoleum non modò quædam edidit in lucem  
eius temporis Hæreticis laruam vt detraheret, (Quæ apud Pitzæum vide-  
re est, & Aleggambe) sed in conuersione *Pickeringi Wottoni*, lethali mor-  
bo decumbentis insignem nauauit operam, & Sancto Dei Zelo plenus ad  
misericordem eius in supplices pietatem experiendam prudenti consilio  
morti proximum præparauit.

XXXXVII. *Pickeringus* hic, primus Filius Baronis *Wottoni*, mag-  
nam partem Galliæ, Italiæ, Hispaniæ, Germaniæ peragrarat, morum &  
linguarum discendarum studio, pro ea quæ Septentrionalibus nationibus  
familiaris est antiqua consuetudine: Corruptæ Religionis quam à teneris  
hauserat erat tenacissimus, tum natura sua, tum Patris *Henrici Wottoni*  
qui apud Venetos agebat Orator institutione: Cum multis multa de fide

1598.  
Argumen-  
tis alijs de-  
tegitur fa-  
bula.

Baconus in  
literis ad a-  
micum Pa-  
tauij.

*Pickeringi*  
*Wottoni*  
conuersio.